

15 di october Caya Grandi mester ta cla

Yobida a stroba Mantbraca pa haci entrega di e trabounan completo diabierna

ORANJESTAD - Siman pasa diabierna e compania Mantbraca Corporation Caribbean mester a entrega algun cos cla di e proyecto di Caya Grandi. En caso cu nan no keda cla cu esaki, e comision lo cuminsa cobra un boet di 1 pro mil pa dia. Pero pa por duna un boet, e comision mester wak kico por a pasa cu no a logra keda cla na tempo. Mantbraca no a logra keda cla pa entrega tur e trabounan aki, pero nan ta haciendo tur nan esfuerso pa por entrega loke cu nan no a logra.

Na diferente ocasion Dienst Openbare Werken (DOW) a reuni cu e compania, pa asina keda "up to date" con tur cos ta andando. Segun Sr. Marlon Croes, Director Interino di DOW na BON DIA ARUBA,

Mantbraca no a logra keda cla cu tur cos na e tempo stipula. DOW ta den reunion cu Mantbraca un biaha y lo sigui haci esaki, y segun e Director Interino esaki ta musta cu nan lo cay aden pa wak con por yuda nan pa por keda cla.

UN PARTI DI TRABOU A WORDO ENTREGA

Segun Sr. Xavier Arends, Manager di proyecto di Mantbraca, nan a logra entrega un parti so di e trabou, pero pa motibo di yobida nan no por a termina. Nan mester a drecha e dañonan cu e yobida a ocasiona. Door di e yobida aki, nan por haya un par di dia di sin tin mester di paga boet. Sr. Arends ta sigui bisa BON DIA ARUBA, pa diabierna awo nan lo keda cla y pa

por termina e proyecto na e tempo stipula. Pa loke ta trata e boet, nan mester sinta cu e comision pa resolve esaki ya cu naturalesa a stroba nan un par di dia.

PA DIA 15 OCTOBER CAYA GRANDI MESTER TA CLA

Durante e reunion di algun siman atras a palabra cu Mantbraca riba e fechanan cu nan mester entrega algun cos cla riba e proyecto, pero esaki un biaha mas no a wordo logra ainda. Dia 29 di september Mantbraca mester finalisa e instalacionnan di e fontein. "Pa dia 15 di october, nos mester sali cu Caya Grandi lo ta completamente cla," Sr. Croes ta bisa BON DIA ARUBA.

COMISION TA DICIDI SI

TA DUNA MAS TEMPO

Den tur proyecto tin contra-tiempo y esaki a pasa cu esun di Caya Grandi, pero momento cu esaki pasa ambos partido mester wak falta di ken esaki ta.

Si ta falta di un contratista ta cobra boet, pero si ta falta fuera di su alcance, e ta haya mas tempo pa termina cu e trabou. E comision ta esun cu ta dicidi si ta duna mas tempo, pero Minister ta para tras di nan.

Unico cos cu Minister a pidi ta pa Mantbraca y e comision tene cuenta pa nan keda cla mas lihe cu e proyecto di Caya Grandi y na e calidad cu Gobierno ta exige. Comerciante y clientenan kier wak con Caya Grandi lo keda. □